



Par cure di
STEFANO GASTI

Viaç par cognossi i problemis plui impuartants che al scuén frontâ l'ambient in region - 2

Lis cassis sul Tiliment



Sale plenonone a Dignan par discuti de liende des cassis (Fotografie www.natisone.it)

"Fermâlu no podin, alore intardinlu"

Serade des grandis ocasions a Dignan te sale dal Municipi, int in pîts, atenzion e batimans. Presints sindics, conseîrs regionâi, tecnics e int di dut il Friûl. Franca Pradetto e à fate la introduzion cjacarant di une comunitât dal flum che e vûl contâ, une comunitât di int madure che e po meti dongje lis soluzion, confrontâlis e palesâ il so parê.

Grant spazi ae propueste dal ingegnîr Gianni Sergio Pascoli, za sindic di Ruvigne, che si à spiegât benon par furlan. Lis oparis che lui al propon par fermâ la plene a sarressin a bas impat e cuasi dal dut dentri grave tal lavio, bande par

bande di un a chel altri rivâl dal arzin.

Lui a lis clame palancadis (ripartidôrs) buinis a fermâ la aghe chel tant di fâle gloti de grave. Trê o cuatri sbaraments fats in chê maniere, ficjâts te grave postâts dongje a di un puint, ma ancje ae juste distance, bogns a fâ slargjâ la plene tignint in maniere dal dut naturâl milions di metrots cubots di aghe. Dut chest cence dighis, cence grandis oparis, nome doprant il slarc naturâl de golene dal Tiliment.

Seont Pascoli, il truc al funzione parcè che pensât cu la logjiche dal Tiliment, un flum unic che al à di

bisugne di une soluzion particolâr, un flum che fermât cuntune dighe di cuintripêl, al fasarès riviel, al jemitlarès la casse di glerie e savalon pe gjonde dai gjavadôrs.

Se si rive a ralentâ la aghe, a bagnâ duçj i gravârs, e po vè il timp di travanâ te glerie fermantsi sot. Bisugnarès meti man a lis rostis che a podaressin, parcè no, vignî dulinvie des bielis pistis pes bicis come tai miôr flums de Europe.

Il president regionâl di Legambiente Giorgio Cavallo, al à dite che tal Laboratori Tiliment che l'assessor De Anna al metarà in pîts si à di podè gambiâ il plan Stralcio, che

A Dignan, une grove propueste: invezit des cassis, fâ su trê o cuatri "palancadis" che a rivin a intardâ la aghe dentri i gravârs fin che e travane sot.

cumò al è leç, ancje parcè il plan des cassis al è intun sît di impuartance comunitarie e al pâr dificil pupilâ un puest che cu lis cassis lu si sdrumarès, impen si podarès meti a puest dut il teritori dongje al Tiliment.

Il conseîr Paolo Menis, za sindic di San Denêl, al à sostignût che cualsei opare e je dificile parcè che la int no si fide e parcè che lis oparis a van dispès daur a grancj interès. E che di ca indenant la int e domande di podè partecipâ ae discussion dal projet ma che bisugnarà decidi par no dâ l'alibi che a scoltâ la int no si rive al cja-

Lis associazions

Associazione "Assieme per il Tagliamento", cu la sò combative presidente Franca Pradetto nus dis: «I problemis dal Tiliment no si à di risolvijûi cui comissaris vignôts di Rome, ma lis istituzions che a àn la responsabilitât des rispuestis a scuegnin scoltâ lis propuestis che a àn buinis fondis tecnichis e scientifichis».

www.assiemeriltagliamento.org


Associazione A.C.Q.U.A. president Renzo Bortolussi. E je par un secont puint a Dignan che al sedi alternativ alis cassis, un puint cu la dople funzion di une plui buine viabilitât e di tegni sot a une plene dal flum, ma che par no menaçâ il paîs di Gradiscje di Spilimberc al varès di sierâ la aghe a un nivel dîs metris plui in bas dal puint di cumò e cuntun program di menâ vie glerie par tignî net l'implant».

www.acquaint.it

veç de cuestion.

Jessint jenfri i comentis dal public, scoltât chel di Valentino Pirona di Dignan (un Pirona doc al dîs lui): «Un projet gnûf, masse sempliç, masse biel, al coste masse pôc: no si po fâ!»

Ce che al proviôt il plan in vore



Il plan in vore in di di vûe al proviôt tra l'altri (cognossût come Piano Stralcio pe sigurece idrauliche dal medi e bas cors dal flum Tiliment, Leç n.69 dal 2001):

- Trê, cuatri vascjis te spuinde diestre sot de strente di Pinçan par racuei aghe tai moments di bisugne e une aste drete lassade al flum;
- une galarie di 11m. par 1500 m. che coventarès a menâ vie la aghe di plui des cassis;
- trê cassis di 800 metrots luncs ognidun e largjece varie par tignî 41 milions di m. cubots di aghe;
- intervent par sbassâ di 5 metrots il plan de grave prin des cassis e arzins in ciment alts 10 m. dilunc par m.16.000.

Il dissen al mostre cemût che a varessin di funzionâ lis cassis tal câs di une plene dal Tiliment

Cassis di espansion: a pro e (massime) cuintri

Lis posizions di politics, aministradôrs publics, ambientalistcj sul projet in vore

SI

«La siele des cassis no je madressude a Tisane, al dîs il cjâf grup dal ulff Ernesto De Marchi, e cumò la Region intindie respietâ e fâ aplicâ une leç dal Stât? O vuelin une rispueste clare des sieltis che fin cumò a son stadis puartadis indenant». Il sindic di Tisane, Micaela Sette, sosten che: «Nô o vin fate la nestre part secont il plan prontê de Autoritât, in cheste maniere no si riscje plui di rompi i arsins, o vin proviodût a slargjâ il lavio, a meti un vinculo a costruî sot dal plan di campagne, ma dut chest al funzione se ancje il rest dal plan al ven metût in vore».

NO

«Il sisteme dal Tiliment, al declare Roberto Pizzutti president dal Wwf regionâl, al è pe Europe il sisteme di riferiment pai studis di sistemazion dai flums, tant che invezit si 'nt projete la distruzion cun inutii cassis di espansion».

NI

L'assessor de Region Elvio De Anna dopo jessis mostrât cuintri des cassis al à scugnût gambiâ posizion disint che al domandarâ a Berlusconi un commissari pal Tiliment. La propueste e à fat inrabîâ i comitatîs de int il Partît Democratic ma ancje la Leghe che par boçje dal segretari provinciâl di Pordenon Enzo Bortolotti al sosten che «al è implen contrari aes cassis pal impat ambiental e pe utilitât no dimostrate».

La Region de sò bande e à finanziaments par meti in sigurece il Tiliment rivâts dal Stât

par 53 milions di euros. L'assessor De Anna al vûl vierzi une sorte di laboratori par discori des esigençis dai teritoris traversâts dal flum tignint cont de bisugne di sigurece, a Tisane, e de salve vuardie dal ambient, tal medi cors. L'assessor Molinaro al sosten che: «A son altris alternativis aes cassis, il flum Tiliment al è une risorse pai teritoris che no po jessi gjavade ae int e no po jessi lassade la decision a un che al scugnarâ cjâlâ te cjartine là che al è il Friûl»



IL DOCUMENTARI

"Tiliment flum di amâ e respietâ"

Dopo il documentari di Alberto Fasulo Rumore Bianco, un gnûf lavôr: "Tagliamento fiume da amare e rispettare" di Archimede Martinis naturalist e Rino Della Bianca fotograf, duçj e doi di San Paoli al Tiliment che a àn metût dongje un documentari fat di desinis di fotos e ripresis fats in agns di torzeonâ pes spuindis dal flum. Il filmât al à la vôs di Licio De Clara ancje par furlan.